

Biaras melodias enconuschentas

La Musica da Lumbrein envida a concert

■ (ac) La Musica da Lumbrein ei pronta. Ella se presenta agl auditori la dumengia da palmas, igl emprem d'avrel ed aunc ina gada ina jamna pli tard ils otg d'avrel. Cun ina media da vegliadetgna da 27 onns astgan ins titular la Musica da Lumbrein per ina musica giuvna. Il dirigent Marcel Cadalbert ei satisfatg digl engaschi da musicistas e musicists ed el attribuescha a sia formaziun da far musica cun plascher. Prender enconuschienscha da quei plascher musical astgan ils adherents dalla musica da stuors a caschun dils dus proxims concerts. Ed els vegnan buc ad esser trumpai dad in program musical variont. El cuntegn denter auter diversas cumposiziuns derivontas dad ovras cineastas detg enconuschentas. Per exempel ina melodia ord il film musical «New York, New York» che datescha

dils onns 70 dil tschentaner passau. La melodia vegn a reguardar beinenqual visitader dil concert a maletgs enconuschents cun ils acturs Liza Minnelli e Robert de Niro. Il medem astgan ins prentender dil «Colonel Bogey-March». Il marsch datescha digl onn 1914 e deriva dalla plema dil cumponist engles Kenneth Alford. Sur ils cunfins engles ei la melodia sederada cun il film «Die Brücke am Kwai» cun sia scena da perschuniers che marschan sur la punt a schulond il marsch. Dad ina melodia pli derasada astgan ins segir era discuerer pertuccont la musica accumpignonta dil film «Forrest Gump» ed aunc pli enconuschents ein probabel ils tuns enramonts dalla ovra cineasta «Pirates Of The Caribbean». Ina gronda part da quellas cumposiziuns deriva dil cumponist tudestg Klaus Badelt. El vala sco

meriteivel creader da musica da film ed ha gia astgau retscheiver diversas distincziuns per sia lavur musicala. Cun il tocs menziunai setracta ei denton sulet dad ina pintga part dil program musical purschius duront ils dus concerts. Ils pigns pirats dalla Musica da Lumbrein astgan medemamein divertir il publicum denter las produziuns dils pirats gronds cun treis tocs ed aschia perschader igl auditori dallas habilitads musicalas dalla giuventetgna. La purschida musicala dalla Musica da Lumbrein ei vasta e varionta, il program d'emprovas ei staus liungs e pulpius aschia ch'igl auditori astga selegrar dad ina presentaziun delectgeivla.

Ils dus concerts han liug igl 1. d'avrel allas 14.00 ed ils 8 d'avrel allas 20.30 en casa da scola a Lumbrein. Ils 8 d'avrel vegn purschius ustria.



Il Quartet dubel da Pigniu concertescha da cuminonza cun il Chor mischedau da Castrisch.

MAD

Castrisch envida a concert

Il Chor mischedau ed il Quartet dubel concerteschan

■ (ac) Il vendergis e la sonda proxima ein ils amatars dil cant envidai alla presentaziun dil Chor mischedau Castrisch e dil Quartet dubel da Pigniu. Omis dus concerts han liug a Castrisch. Il Chor mischedau da Castrisch ha demussau ils davos onns dad esser aviarts per diversas scopertas musicalas. Il chor dirigiu dad Andrea Veraguth de Groot sededichescha ton alla musica tradiziunala romontscha sco a tuns pli moderns e pli derasai. Il chor ei era promts d'experimentar ina ga ni l'autra ed ha cheutras slargau cuntinuadamein il repertori. Cun il program actual ei il chor restaus fideivels alla filosofia e porscha, cun intunaziuns da Gion Balzer Casanova, Marcus ed Alexi e cun «La flur d'amur» da Linard Bardill, melodias popularas ord la plema indigena. Ord la plema dad in cumponist indigen

derivan era ils «Siemis da stad». Gion Tschuur ha schaffiu quella cumposiziun aposta per il Chor mischedau da Castrisch. In'ovra che vegn presentada il vendergis proxim per l'emprema ga agl auditori. Cun «When the stars begin to fall» in gospel ed «Only you» sco «Have a nice day» ha il chor mischedau era aviert quella ga la porta musicala e porscha aschia in program variont.

Il chor mischedau sebratta els concerts dil vendergis e dalla sonda proxima cun il Quartet dubel da Pigniu. Vuler presentar quella gruppa dirigida dad Albert Specha fuss purtau aua el Rein. Il Quartet dubel ha elavurau ina ferma posiziun enteifer la scena da cant en Surselva ed el cantun Grischun. La formaziun porscha in vast schatg ord il scazi dalla canzun populara. Il Quartet dubel sebratta a Castrisch denton

era cun musica da Mozart, numnadamein ord la opera «La nozza di Figaro». Vinavon cun ina cumposiziun ord la plema dil dirigent enramada dad in text da Giachen Hasper Muoth. D'udir ei denter auter «Nossa compignia» da Duri Sialm, «Il roser», in arranschament da Claudio Simonet, «Zigeunerleben» ed aunc bia auter. Als amatars dalla canzun populara romontscha astgass il cor batter empau pli fetg en vesta allas canzuns comunablas. Ei setracta da duas beinenconuschentas melodias da Tumasch Dolf. «Giu enten quella val» e «Mintga sera cu jeu varghel».

Ils concerts dil Chor mischedau Castrisch e dil Quartet dubel da Pigniu ha liug vendergis, ils 23 da mars e sonda, ils 24 da mars en casa da scola a Castrisch. Ils concerts entscheivan mintgamai allas 20.15. Il vendergis vegn purschius stiva da caffè e la sonda sault.



La Musica da Lumbrein selegra d'astgar beneventar in vast auditori a caschun dils dus concerts da Pastgas.

MAD

TALUN D'EMPUSTAZIUN

LA QUOTIDIANA

Jau abunesch La Quotidiana

- 2 mais frs 25.- (abunament d'emprova)
- 6 mais frs 86.-
- 12 mais frs 163.-
- 24 mais frs 293.-

Num _____
 Prenum _____
 Adressa _____
 NP/Lieu _____
 Data _____
 Suttascripziun _____
 Tel.-Nr. _____

P. pl. trametter a:
 Südostschweiz Presse AG
 Servetsch d'abunaments
 Via da la Caserna 1
 7007 Cuira
 Empustaziun telefonica:
 081 255 55 00

Ensemen fai dapli plaschair

procap
 Procap Grischun
 Tel. 081 253 07 07
 www.procapgrischun.ch

Concurrenza per tuts talents musicals dalla Surselva

Il Lions-Club Surselva e la Scola da musica Surselva han prolungiu il termin d'annunzia

■ (anr/sr) Ils dus da zercladur 2012 ha la 12avla ediziun digl inscunter musical cun concurrenza pil Premi-Lions liug a Glion. Per l'emprema ga san era talents musicals ordeifer la Scola da musica Surselva separticipar. Tochen uss ein denton mo paucs da quels s'annunziai e perquei ha il comite d'organisasiun prolungiu il termin d'annunzia tochen ils 16 d'avrel 2012. «Nus sprein ch'ei detti aunc biaras annunzias, oravontut era da musicantas e musicants ord societads da musica ni era d'ensembles», appellescha Martin Tomaschett dil Lions-Club Surselva che tgamuna il comite d'organisasiun. La finamira seigi d'organisar in grond event musical a Glion e da contonscher tons amitsg dalla musica sco mo pusseivel. Quei seigi era il motiv ch'ins hagi midau las reglas dalla concurrenza da Lions e tut tgi che hagi plascher e gust sappi separticipar. La concurrenza ei pia buca pli exclusivamein mo per scolaras e scolaras dalla Scola da musica Surselva. «Era giuvenils e carschi ord l'entira Surselva che fan buca part dalla Scola da musica Surselva ein cordialmein beinvegni da sepresentar ellas spartas cant ni musica instrumental», puntuescha Martin Tomaschett ed aschunta ch'ei seigi perschuadius ch'ei detti aunc biars talents da musica en Surselva che seigien aunc mai sepresentai alla concurrenza pil Premi-Lions. Per l'emprema ga vegn la fiasta musicala era extendida cun in program dalla sera

cun produziuns libras ed in concert da rock e pop. «Forsa dat quei in auter onn schizun in'ulteriura categoria per nosa concurrenza», di Martin Tomaschett ed

aschunta che quei stoppi aunc vegnir examinau. Ussa selegrien ei da massa annunzias ed ina biala fiasta da musica l'entschatta zercladur.

Formulars d'annunzia e dapli informaziuns anfleis vos sut:

www.bzs-surselva.ch ni
<https://surselva.lionsclub.ch/>



Tuts talents da musica dalla Surselva, giuvens e pli vegls ein envidai da separticipar alla concurrenza da musica dil Premi-Lions.

FOTO S. ROTHMUND